

Nov/Dec
2009

THUPUAK

Pasian in Kha ahi hi. Amah abiate in lungsim leh thumaan
thutak tawh abia ding uh hi. (John 4:24)

Myanmar Mission Church (Florida, USA)

Pastor Rev. Kham Do Thang(Sia Thangno)

Home phone (561)-540-6006

Cell phone (561)-707-8729

Kawl pau tawh Pasian biakna:-

Sunday-(8:30pm pan 10:30pm)


Zo pau tawh Pasian biakna:-Sunday- The last week of the month
(8:30pm pan 10:30pm)**Neek-khawm(Communion Service)**

Sunday- The first week of the month

Amun:-

1019 N.24th Ave, Hollywood, FL 33020

Myanmar Mission Church Biakinn Map



Zo pau tawh biakpiak khop dingni--
(January 31, 2010-- 8:30 pm-10:30 pm)

Zomite khat leh khat ong ki-zom sak ding**LAIZOMTE GROUP**<http://groups.yahoo.com/group/laizomte/>

**USA Thupuak a beisa khempeuh na sim kik
nop leh a nuai a link pan ki-en thei**

<http://zomilibrary.com/main/items/show/362>

**Zomi tawh kisai lai manpha tuamtuam na sim
nop leh a nuai a Zomi Online Library link
pan ki-lut thei**

www.zomilibrary.com

USA Thupuak aa ding huhna a
pia nuamte in " Myanmar Mis-
sion Church " min tawh
check/MO kipuak thei hi

Mailing Address:-

PO Box 6676

Lake Worth FL 33466

Email:- usathupuak@yahoo.com

Copyright Reserved



MMC Zoliate in lasakna tawh Christmas muak

Editor:- Pa Neng Khan Pau (Nepau)

786-543-1790(Nepaulehsaw@gmail.com)

Joint Editor:- Pa Vungh Pian Sing(Singpi)

Circulation Manager:- Pa Kham Kap Hang(Hangbawi)

Photographer:- Pa Dal Za Lian(Ko Pauk)

Advisers:-

Tg Pau Cin Thang(Thangbawi)

Tg Tawng Cin Khai(Tawngkhai)

Makai ih cih pen kipawl khopna sungah a thupi mahmah din mun ahi hi. Makai pa' geel dan leh vaihawm dan in kimakaih ahih manin, makai hoih a kineih leh daupaina leh gual zawhna tampi kimu thei hi. Makai gina lo khat ih neih leh maizumna tampi hong piang sak thei hi. Tua bek tham lo-in, guallehna tampi hong tun pih thei lai hi.

Makai picing khat ii din mun nampi sagih in i khen thei hi.

1. Makai khat ih cih teh , Pasion it leh a zahtak mi hi ding hi.

Makai pa in Pasion it leh zahtak ahih manin, a nasepna, a vaihawmna, a makaihna khempeuh ah Pasion' deihna tawh kituakin hong seem ding hi. Lam khat pan in ama' upna, leh zuihna biakna lam ah zong a hahkat mi hi ding hi. Pasion' deihna tawh kituak lohna khempeuh zong a nial ngam zo pa zong hi ding hi.

2. Lungduai mi hi ding hi.

Makai pa in a lungduai/ a lungsau mi ahih ding thupi mahmah hi. Bang hang hiam cih leh mitampi makaih ahih mah bangin, mihing khat leh khat kibang lo leh lungsim ngaihsut kituak lo tampi makaih ahih manin, a lungduai' zawh ding thupi hi. Laisiangtho lui sungah Moses pen a lungduai mahmah khatin na kiciamteh hi. Moses in a makaihna ah, a sanggamte nangawng in zong mawhsak leh na simmawh bawl uh hi. A hi zongin Moses in thuk kik lo-in, na lungduai hithiat hi. Lungduaina in makai picing hong piang sak zo pan hi.

3. Ama' aa ding ngaihsun lo-in, mipi aa ding ngaihsun ding hi.

Makai pa in, ama' angung ngaihsutna tawh makai hilo ding hi. Mipi tung sum meet bawl na a nei mi hi lo ding hi. Mipi aa ding ka sep theih, mipi nop sakna ding, hamphat ding bang ka sem thei ding hiam ci-in a a ngaihsun mi hi ding hi. Mipite lungkham sak den, haksatna a pia den makai hilo ding hi. President John F. Kennedy in, "Ka gam in kei ading bang hong sep sak thei ding hiam? hi masalo in, ke'n ka gam aa ding bang sem thei ding ka hiam?" na ci hi. Lam khat pan gen le hang, ka gam aa ding in koi bangin thupha khat hi thei ding ka hi hiam? , a na cihna a hi hi. Mipi aa ding na sup lawh

ngam leh mipi zong nang aa ding hong sup lawh ngam ding hi. Na vawh bangin na at ding hi.

4. Citak ding hi.

Citak ding ih cih teh, thuman,



Rev Kham Do Thang

kuhkal ding cihna zong hi pah hi. Ama' na sepna tungah a citak mi hi ding hi. A ma' nasep a it leh thuman, diktak in, a keemcing mi hi ding hi. A vaihawmna, a nasepna peuhpeuh ah a citak mi hi ding hi. Tua bek lo in, sum leh paai ah, hun ah, thu leh la ah thuman in, citak mi hi ding hi.

5. Amah leh amah a kikeem zo mi hi ding hi.

Makai khat ahih man in, mite' nung ah pai hi lo-in, mite' mai ah pai a, mipi in amah mu den hi. Tua ahih manin et-teh taak makai pa ahih ding thupi hi. A gamtatna khempeuh ah a kikeem zo mi hi ding hi. A ma' pumpi nangawn kikeem zolo, makai zo lo pa khat in, bang hangin a mi pihte makai zo ding hiam? Pasal leh numei kizopna ah a siangtho mi hi ding hi. Kam pau, muk pau ah a kikem zo mi hi ding hi. Laisiangtho sung ah, Joseph in a Tonu lup pih nopna panin amah leh amah na ki keem zo hi. (Piancilna 39:12)

6. Ngaihsut piakna(Advice) asang thei mi hi ding hi. Kei makai ka hi hi, kei' thu bangbangin hong kimang kul ding hi. Kei' thu bek mah thupi, mipi thugente, thupi kei, ci-a, amah leh amah thupi a kisak leh mipite makai thei lo ding a, mipi tawh lam ton khawm thei lo-in , kikal kha den ding hi. Mipi' thugen leh ngaihsut piaknate zong a sang siam mi hi ding hi.

7. Thu khensat baih pahpah lo ding hi.

Thu khat peuhpeuh khensat pakpak lo ding hi. Thu sia khat peuh zaakna, theihna, muhnate mipi' sung ah a-om leh, thu langkhat bek zaakna tawh baih no tak in, khensat pah lo ding hi. Thu leh la, a lang nih panin, kicingtakin a laak khit, a ngah khit teh, thu ngaihsun siam tampite tawh hun tampi la in, mantak in a khensat pan mi hi ding hi. A lang khat pa' muhdahna, et neuna, telsiam theih lohna hang tawh baih no takin, khensat in, a lel sak khawng suak sak lo ding hi.

Hunzui Thupiang

(1) Myanmar Mission Church in kha khat in khatvei ta antan thungetna kinei den a, December 31 ni in biakinn ah nuam takin kinei thei hi. Mai Zo pau tawh biakpiakna pen January kha 31 nipi nitaak in kinei ding hi. Akua mapeuh kong zawn uh hi.

(2) December 25 ni in lungdambawl pawl biakinn ah nuam takin kibawl hi. Biakpiakna sun 11:00 in kipan a, hun man khit teh sa-em neek khopna kinei hi. Tua khit teh, gualnopna kimawl tuamtuam leh nupa a kopkop in laamna tawh nitaak nai 5:30 in kiman zo pan a, nuam mahmah hi.

(3) December 12 ni nitaak in a masa pen Zolus Concert Hollywood, Florida ah nuam takin kibawl thei a, Florida-a om Zomi khangno la siam/ tunging siam tampi kihel uh hi. Tulsa pan Rev. Dr. Kham Khan Khai in Zolus ong pian khiat dan leh mai lam ah sep ding mabante pulaakna nei a, Zolus ah pawl-lut(life member) mi 30 kiim kibehlap hi. Dollar \$ 100 pan a tamzaw a plate pen pawl-lut mi in kiciamteh hi.

(4) December 22 nitaak in, Burmese Assembly of God Church (BAGC) hanciamna tawh Kawlte leh Pasian' thu-um lote' tung ah Lungdambawl ahi gupkhiatna genna Fort Lauderdale biakinn ah kibawl hi. A pai khempeuh anvaak in, la siam minthang Sung Tin Par in Pasian' la tuamtuam sa hi. Pawlpi sung pan khangnote, Tg Khualtawng leh Tg Nungbawi-te in tungingte tum sak uh hi.

(5) Florida Zomi Innkuan makai lui leh makai a thakte nasep ki-apna December 21 ni nitaak in kibawl a, a nuai a makai thakte' aa ding thu kinget sak hi.

- | | |
|--|--------------------------|
| 1. President | Pa.Gin Za Mung |
| 2. Vice President | Pa.Pum Za Khai |
| 3. General Secretary | Pa.Kam Sian Lian |
| 4. Assistant General Secretary | Nu.Dim Khan Lun |
| 5. Finance Secretary | Pa.Freddy Lang Suan Mung |
| 6. Treasurer | Pa.Thang Do Hang |
| 7. Auditor | Pa. Zam Khan Kam |
| 8. Religious Secretary | Pa. Lian Thawn Thang |
| 9. Assistant religious Secretary | Pa.John Thang Pau |
| 10. Culture & Literature Secretary | Tg.Tawng Cin Khai |
| 11. Assistant culture & Literature | Pa.Lian Khan Mung |
| 12. Music Director | Pa. Thang Suan Mang |
| 13. Assistant Music Director | Pa.Cin Lian Mung |
| 14. Games & Sport Secretary | Pa.En Lian Pau |
| 15. Assistant games & Sport and Youth Leader | Tg.Pau Zaa Dot |

Veeng Hausa teng--

- | | |
|-----------------------|-----------------------|
| 1. Tg.Zam Za Lian | Kendall Veeng |
| 2. Nu.Vung Khen Niang | Miami Veeng |
| 3. Pa.Pau Za Khai | Fort Lauderdale veeng |
| 4.Pa.Khen Kim Sing | Palm Beach Veeng |

(6) Zomi Association of USA (ZAUS) in Zomi Directory USA 2009 December 28 ni in bawl khinin, a sawt lo-in online pan et theih ding on g ki khak khia ding hi. Tua ban ah, Summer sung Zolai sin ding gel na om in, Rev. Khoi Lam Thang' bawl "Zolia Sinna" lai bu zang ding uh hi. Hih kipawlna pen 2009 kum sungin ong piang khia hi a, haksatna tuak gamgii lam ah a om Zomite huutna ding leh minam vaite ah US kumpi in ong theih pihna ding ngimna tawh a kiphut hi a, Oregon-a Pu Zam King Mang leh a lawmte pawlkhat tawh kipan khia ahi hi.

(7) Zomi Innkuan (USA) kipawlna pan in zong USA bup a Zomite a huam ding Directory a thak khat a kihanciam san laitak hi a, February 20 ni ma in bawl khiat zawh ding ngimna lianpi ahi hi. Tua ban ah, Zomite in a zat theih ding, website gina khat zong lai lam makai pute in a hanciam san laitak ahi hi.

(8) FZI pawl lutang ahi Pa Gin Za Mung leh a zi Nu Hang Za Neem tung pan in ta pasal khat December 23 nitaak nai 4:53 in Women Birth Center pan suak a, a min pen Tg Moses Mang Thian Mung ahi hi. Nau leh a nu zong cidam uh hi.

(9) January 13, 2010 ni-in Phaisat khua gei pan Zo gam leh Zomite' aa ding a nuai-a mi nih in a nuntakna uh pia khia hi.

(1) Taang Thang Za Muan @ Mark, New Lamka

(2) Taang Thang Min Lun @ Tiger, Tiger of Sanggaikote.

(Source:- ZSYO report, January 2010)

(10) Florida, Miami veeng haus a Nu Vung Khen Niang ii a it a pa, Pu Lang Gin Thang in Malaysia, Kuala Lumpur pan 01/06/10 ni in ong nusia hi. Topan' a dah a kapte ong hehneem ta hen!

(11) Florida, Palm Beach ah a om Tg Thang Suan Muang ii a it a pa, Tedim gam uk Saizang khua a Nu Cing Khan Vung in a it a pasal Pa Vum Do Nang in Tedim zato panin January 23 ni in ong nusia ahih manin ih dah pih hi.

Thungetna ah phawk ni

1. MMC pawlpi in Topa biakpiakna ding mun kip khat neih zawhna ding leh pawlpi vanzat-te a kim in, neih zawhna ding.

2. MMC pawlpi in Naupang sang khat neih zawhna ding leh ahih ding sia khat zong neih zawhna ding.

3. Kawl gam ah mission nasep Sia Lun Za Thangte innkuan Topa'n lawhcinna tampi ong muh sakna ding

4. MMC pawlpi nasepna leh USA Thupuak Interview-te ah zat ding professional camcorder \$ 3000 man khat lei zawhna ding.

5. Sia Mengpu' tupa(Tg Gabriel) a dam siangna ding.

6. Kawl gam leh USA a uk kumpite' aa ding.

7. Washington DC a om Pa Thawng Lian Hau(Lianpi) November 14 ni mawtaw tuahsiatna pan a ngah natnate pan dam siangna a ngahna ding.

"Gensiatna pen pau khol lo-in om hithiatna tawh ol no takin kipeel thei hi" Aristotle. Mi khat aa dingin gensiatna ih cih in, singkung a nuntaakna ding van pan ong kia guahtui tawh kibang a, tua guahtuite in singzungte susia zah dongin khauh lo hi(Frank A. Clark). Nang sangin khua a mu nai lote na gensiat ma in, amau a na pantachte phawk in(Unknown). Gensiatna, kona, mawhsakna cihte pen mi hai khempeuh in seem thei lel a, mi haite' nasep hi zaw hi(Dale Carnegie).



Dr. J M Ngul Khan Pau

Steven Mills in a laigelhna, "We build People" cih thulu tawh a nuai-a bangin puaksiam ding na gen hi.

1. Gensiatna ngah ding kilamen khol in. Makai sepna sung pan kituak hi. Sepna bawl na tawh kisai gensiatna tuamtuam ong piang thei ding cih ngaihsun khol in, mipi zong thei sak khol in, a pian ma hi ta leh a pian saan laitak hi ta leh gamtat luheek zia kidawm in.
2. Nang leh nang kigum kei in. Gensiatna tungtawn in thu theih beh sawm zaw in. Lim kei ta leh na cidamna ding ahih manin, ne teitei in. Ong kigensiatnate lak ah kilambehna na ngah sunsunte ciamteh in.
3. Gensiatna san' theih ding namte khen siam in. Mi'n ong gensiatnate thusim loh luatna leh thusim luatna pen lauhuai hi. Kluasik natna pen cancer bangin patau in, cancer natna pen awlmawh loh tawh kibang hi. Na lawhcin man in hamphatna a ngah dingte' lam pan gensiatnate pen sang in.
4. Nang leh nang kikheem ke'n. Ahi takpi mah hiam ci in kisit kik in. A gen siam lote' gensiatna pen san' ding haksa hi.
5. Pasion mah kuppiah masa in. "Topa aw, kei nong gen nopna takpi hiam? Hih gensiatna pen ahi takpi mah in ngaihsun phawt in. Pasion in nang ong kep nop zawk man zong hi thei hi.
6. Ong gensianate' kha-theihsakna pan maw lungsona pan maw cih khen siam in. Kamsanna thupha a ngah khat in hehpihna kha thupha a ngah khat sangin tamvei gensia zaw ding hi. Dam tak a pai a dei khat in, a kinawh nuamte gensia mun hi. Eite in, ih hatna teng leh mite' hat lohna teng bek ki-en kha den hi.
7. A gensiatna thute a namnam in khen in. Na upna maw, na kalsuan dan maw, nang mahmah ong gensia uh maw cih thei in. Tua hi leh, bang cih ding cih na thei ding hi.
8. Nang' thu ong kin pih uh lungdam in. Na lawmte hi ta kei leh, lawm bangin tuat in la ong lunghihmawh pihna uh na lungdamna lak in. Tua hi leh, amau muhna ah, kilambeh ding a ut khat in ong mu ding hi.
9. Gensiatna pan khat leh khat a zo ding kidemna suak sak kei in. Mimal kikapna suak baihi. Ei lam pan ih manna ih lah nop ciangin, a thu tawh sangin a mi

peuh kido kha thei hi. Gal zawhna ding pawlkhatte pen kido na ah lelhna pan zong hi thei ahih manin kisin ni.

10. Gensiatna pen khantohna ding hamphatna hi. A hoih ding deihna tawh gensiatnate la in. David nuntaakna pen, a lawm Nathan in thumaan tawh a gensiat manin kikhel hi.
11. Gensiatna tawh kiteh in. Gensiatnate na puaksiamnate in na nuntaakna ah Pasion' hehpihna na san lam ong kilang sak uh ahi hi. Kha lam kitehna vanzat khat ahi hi.
12. Na khialh leh kiphelh kei in. Nang dik teh, kei khial ing, ci in thuum in.
13. Thuk kik sawm kei in. Kigensiatna pen na vilvel ahih manin, puak hak hi. Thuk kik sawm lo in, Kha tha tawh kihem in. Ong kigensiatnate mipi mai ah thu nget leh thugen kawmin hem dawn kik se kei in. "Thuk kikna in kei' aa hi" Pasion in ci ih..

Thu dam tawh bangci gensiat ding:

A zate in nuam a sak loh ding lau in, kua mah a gensia nuam lo mi tampi om hi. Ahi zongin, thu dam tawh gensiatna pen deih huai hi. Hoihna a piang sak gensiantna pen ngaihsut kholhna tawh kiseem thei hi.

1. Huh nuam taktak in. Ong pii muh ding na ut man hi sak kei in.
2. Nang' tung ah ong kihih leh na dei dan lian in kam pau in la seem in.
3. Hun hoih ngak in. A lungkim loh laitak a buai laitak pen hun hoih hi lo mai thei hi.
4. Phat bawl le cin ong sang siam ding hi.
5. Na huh nop lam thei sak in. Ong deihsakte' gen pen kisang thei baihi.
6. Kam siam in. Ahi bang na genna tawh mi heh lo zaw a, na gen siam loh man in kizadah thei hi.
7. Na gen thute na ngaihsun takpi ding hi ci-in khamuang in na om lam, a tawpna ah thei sak in.

King's College ah president a seem Robert Cook in hi bangin na gen hi. Pasion' nasep a kipat tung lai in, gensiatna pawlkhat ngah hi. Thu a kup pih ding Laisiangtho a thuuk theih mahmah pawlpi keem lawm khat, Harry A. Ironside, kiang ah pai in dong tangial hi. Cook in a ki gensiatnate bang cih ding cih a dot ciangin, "Rob, ong gensiatna a hi takpi thu ahih leh kikhel in. Ahi lo pi ahih leh, manggilh in," ci in a dawng kik hi.

Norman Vincent Peale in, "A tam zaw pen kigensiatna in ong keem a, kiphatna in ong susia zaw citciat hi" ci hi. Pasion in mi hoih zaw, makai hoih zaw dingin ong bawl na hi ci in ih san theih leh gensiatnate puak dan i siam ding hi.

[Dr. J M Ngul Khan Pau' laigelh, "How to handle criticism" pan Zo lai tawh a kitei khia sawn hi..... Editor]

Gammial nasepni (Mission Day) tawh kisai MMC ah Hanthotna(Dr. Khen Za Sian)

Kum 29-30 sung Pastor ka sepna ah, kitenna, tuiphumna, thugenna tuamtuum leh minam vai thugenna tampi ka nei a, hih Mission Day, cih tawh kisai ka thugen masakna ahih manin ka lungdamin ka angtang mahmah hi.

“ Note in tu a kipanin kha 4 ciangin buh at a om ding hi, cih na thei uh hi. Ke’n kong cih in, buh a min zo a, a at a hun ta hi. Khuadaakin en un.” (John 4: 35)

Mission cih pen, Greek kam lam pan hilh cianna lam sang-in, ei’ theih dan tawm gen ni. Ei Zomite’n ah, Mission cih ciangin, gam mial phul ding hi pah mawk hi. Leitung



pau danin gen le hang, gal do ding hi mawk hi. Leitung ah biakna tampi om a, ei Zomite in ih up pen, sihna pan a tho kik Zeisu hi. Leitung ah taangthu kiciaptehna World History sung ah Zomi cih pen om tawntung hi. 1953 kum in ah Dr Rekiaw ii pa, Pastor Sangte in Zo gam bup a Christian kipawlna lianpi a min dingin, Zomi Baptist Convention ding a genna pen na kikip sak hi. Pasion’ naseem Dr Steward in Zomi cih pen Zo gam bup min dingin Pasion’ tung ah thungetna tawh apna na nei hi.

Ih omna pen keen kawm hi-in, i an lim pen vaimim leh ga hi-in, i zasan lim penpen pen innka dawn-a lothang pum leh be ik(be kan) peuh hi lel ngel hi. Nitumna lam ah, Pasion um lo Muslim leh Hindu-te, i leitaw lam-ate pen Rakhine (Milim bia leh Muslim), leilu lam ah milim biate leh i nisuhna lam en le’ng milim biate vive mah, tua teng kawm kal ah om, a it huai a mel hoih lah hi peuhmah lo kim lai itna tawh ong tuam i Topa in minthanna ngah hen.

Leitung ah biakna bang zah om hiam? Biakna paipi taktak pen, Christian, Islam, Buddhism, Hindu leh Shinto-- a vekin nam 5 bang pha hi. Ei gam mahmah ah zong, Pasion zah a, ih gam aa ding a ih ciapteh khat Pu Pau Cin Hau om hi. Ih Pasion’ nasep dan kibang het lo in, Hindustan-te in a minam

zui-in, ei aa ding hi ci-in la-in, gam mial pen nawk sawm khol lo uh hi. Tua mah bangin, milim biate’n zong ngeina dan in a nei suak dingun kingaihsun uh hi. Pau Cin Haute’n pen gam mial nasepna na nei uh a, amau’ nasep dan pen, dawi biakna(Law-ki) panin beltung muut upna ah kikhel sak in dawi zong hawl khia uh a, mi zong a dam tampi na om uh hi. Muslim-te leuleu in ah, pasal khat in zi 5 bang nei ding, ta nei ziahziah ding, tua tung pan Muslim mi khang ding cih pen amau gam mial nasep dan hi. Ahih hang, ei Pasion’ thu-umte pen in, a lian sa khat, a lungsim nei sa khat, Pasion’ lunglut lo khat, a lungtang kikhel ek ding in Christian ong suak ding cih hi mawk in tua nasepna pen mihing tha

tawh kizo lo a, Khasiangtho vaangliatna bek tawh kizo thei hi. Tua bek tham lo, ih Pasion biakte ciat en le hang; Muslim te’ pasian Mohammad in T.B veii-in, a nungzaang ah meimai khia a, si-in a vuina uh pen tu’n mun siangtho ci uh hi. Kawl pasian, Go-damah pen, a thugen paina lam ah mipite’n na deihsak in, voksa na vaak uhin a sungpai-in si hi. Hindu-te pasian in pen, “Ka sih ciang, ka luang pen Ganga river kici gun ah ong paai un,” ci a, a nung a zui peuh mah in a sih ciang tua gun ah kipaai hi. Ei Christian-te’ aa pen a lamdang tuam mahmah in ah, van pan-in ong pai suk a, eite tawh ong om khawm hi. Pu Pau Cin Hau si pen tho kik tuan lo a, biakna dang pasiante si zong tho kik tuan lo-in, sihna a zo pen ei’ Pasion bek hi. Tua ahih manin, i gam mial nasep dan lamdangin, ih biak Pasion zong kibang lo hi. Hih nasep pen, a baihet lo khat hi. Jackson Kawl gam ah kum 6 tawntung ong sep ciang U Naw bek ong kikhel hi.

Topa Zeisu in kha mangthang khat a mat na dingin ah vok tul 2 val that hel hi. Zeisu a khualzin laitakin, han lak pan dawi lut mi khat kiang ah Zeisu in a min a dawt leh, “ Then tampi hi ung, tampi takte hi ung” ci hi. Amau Zeisu in a hawl khat ding lam thei khol ahih ciangun, a gal-a mualtung-a vokte’ lak ah lut sak ding na ngen uh hi. Tua vok tul 2 kim pen ken ah kia-in si uh hi. Tu lai bang hi leh, kiliau sak kha mai ding hi. Kha mangthang khat a kikhel ding pen a haksa mahmah hi.

Khatvei, Tuithang ah Sia Kamte' inn ah va tung, zan 3 om, kei lah Khasiangtho in ong sawl, a man lah ong nunglehek san, " Sia Kam, khatvei beek ong tut pih ve" ka cih leh, " A bang kikum ding ih hia, na gen ding teng lah ka thei sa hi" ong cih san hi. " Na theih sa teng na sung ah nungta lo ahih manin nungta sak in" ka ci hi. Ni 7 ka taam khitciang ong kikhel hi. Hamsa mahmah hi. An zong limtak in ong kipia khol lo, ahih hang Pasion' sawlna ahih manin, Sia Hang Kam ong kikhel ciang, a khua ah khanlawhna ong tung pah hi.

Topa Zeisu in, khatvei, lam a pai laitak in, tui khuk gei ah khawl a, a nungzuite an lei ding in a paam-a khua ah a sawl hi. A sawt lo in, tui tawi numei khat ong pai a, Zeisu in tui a nget leh, tua numei nu in lamdang a sa hi. Tua ciang in Zeisu in, "Na kiang-a tui ong ngen pa thei hi lecin, a ma' kiang ah tui na ngen ding a, na dang a taak nawn kei ding a, na sung pan in nuntaakna tui ong phul khia ding hi" ci hi. A nungzuite ong tun ciang, " Khuadak un la en un, buh at hun a tung zo hi..." ci hi. Tu laitakin, i gam ah Pastor tampi tak mikhem bek a, a vak zong om hi. Khamtung ah gupna thugen awng lala a, Zangkong tun ciang Beer sai khawng ah a tu peuh ki-om zanzan hi. Christian sung mahmah ah zong tapa tai mang bang in Pasion' muhna ah kih huai mahmah ta hi. USA bang pen ka khasiat suak peuh mah hi. Ka zinna khua khat bang pen, pawlpi member a kikhum dan uh pen, Pasion' thu um maw, um lo maw cih hi lo. Gam dang pan ong tung uh in, a Pastor dingte un deih tak a delh uh in, zum vai tuamtuam bawl sak uh-in, tua tawh member la mai uh in, upna om lo a sia pa aa-na man tawh tu demdam mawk uh hi. Tu ni in, lungsim tak mah tawh Topa biak ding ong deih hi. Tu laitakin, ih Kawl hi ta leh, hih USA a tung Zomite hi ta le uh cin, dollar tul za ong pia ning na biakna khawl in, ci-in ong zol sim om leh, a sim khawl ding mi 100 lak ah 80 om dingin um ing. Laisiangtho in, sum lunggulh luatna pen mawhna kipat na hi, ci hi.

Pasion' thu lungdamna thugen ding in, mangkangte lak hi ta leh, koikoi hi ta leh kihawmthawh kei un. Ih Topa in ong gualzawh pih ding hi. Thuciamlui ah, Elijah kamsang hun sung in, Syria kumpi ong khang in, Samaria kulhpi ong umcih a, Samaria khuapi sung ah kial ong tung hi. Tua lai in, miphakte pen khua pua lam ah kikoih hi. Kumpipa' kiang ah numei nih ong kikhia ta hi. " Hih nu in ong khem hi; zanni in ah,

kei' ta ne dingin, tu ni ama' ta ne ding ci-in, tu ni ciang a ta na seel hi" ci hi. Tate a ne ciang dinmun tung hi. Kha lam ah en le hang, ei Zomite' sung ah Pasion um mahmah hang, ih cih hangin, lungdamna mel thei lo, i tate/tute kilem thei lo, nupa nangawn kilem thei lo, ih dinmun pen a niam mahmah hi ta hi. Zeisu in Jerusalem khuapi a muh ciangun, " Jerusalem khuapi aw, akpi in a note a khanuai ah a khop bangin nang zong tamvei pi kong khawm nuam hi. Ahih hang nang na ut kei hi." ci hi. Ih mimal sung ah, i innkuan sung ah Pasion lunggulhna taktak om nawn khol lo hi.

Ih thugen ngaih nop khawngte zong pen, 'thupha ngahta un, dollar la dingin Topa in ong bawl ta hen, dangka tua zah nei ta un' a ci-te bek sang thei-in, Laisiangtho bang a, '10 ah 1 na biakinn ah pia in' a kicih leh, ka utna bangin pia ning, ci-in lu a pei velvel peuh i hi hi. Laisiangtho bangin gen le hang lu pei san lel a, amau a phat thei-te bek thugen siam a ci-te pen kha lam pan en le hang kha kial ong tung hi. Ih Kawl gam bang pen dah huai mahmah hi. Gam dang zin a nei thei teng khang in, a nei thei lo teng khang mel lo hi. Leitung in Zeisu Khazih hehpihna kinak sap mahmah ta hi.

Samaria kulh pua lam ah a om mi phak 4-te paina khe ging pen Syria galkapte in lau-in na tai khia uh hi. Tua galkapte' buuk sung ah neek theih tampite a neek khit uh ciang, tua kial tun na khua sung-a om a kumpipa leh mite khempeuh zong thei sak ni, ci uh hi. Tu ni in eite zong, ih muh lungdamna thu pen hih khuapi sung, a kialte' tung ah ih va koh ding ahi hi. Pasion in, "Na mite' tung ah na gen kei leh, a sisan man nang' tung ah kong siik ding hi" ci hi. Lungdamna thu a keem dingte bek hi lo-in, mi' lak ah a puak dingte i hi hi. Gamtatna tawh a lak khia dingte hi hang. A lamdang khat ah, Pasion in a gina lote zangh citciat hi. Moses a nung ah galkapte in delh, a mai ah San tuiipi in a dal laitakin, a gan cinna ciangkhut Pasion in vaan sak hi.

Tu ni-in kineu muh kei ni. Vantung ih tun ciangin, Pasion' aa ding bang zah kipia khia, sum bang zah zangh cih bek kiciamteh ding hi. Vantung gam ih tun sawm taktak leh, ih kisik loh dingin Topa Zeisu in 'note khuadak un, buhte a min zo hi' acih mah bangin, gam mial lungtang pua ciat ni.

Kawl gam pan USA ka tun' ciangin Kawl gam ah ka muh khak ngei khol loh dinosaur guh lim tuamtuam ka mu kha koikoi a, "Lawmte'n dinosaur it phadiak uh ee!" kei leh kei ka ci thei zel hi. Tua ciang bek tawh hi lo in, sang naupangte in a sang kahna uh ah, mihingte zawng peuh ngau peuh tawh kibehkhat cih dan in a sin uh khawng ka nung theihtheih ciangin um ngam lo phialin dah huai mahmah ka sa hi. Tua ngaihsutna pen kikhel tohtohna, evolution theory kici a, a ngaihsun khia pa' min pan kila in, Darwin upna (Darwinism) zong kici hi. Hih Darwin upna leh Laisiangtho ah Pasion in mi a bawl na, Creationism pen kilehbulh lian ahah manin, khat a maan leh khat khial hamtang ding cihna hi pah hi.

Bang hangin, mi 100 lak ah Pasion bia 75 bang a omna gam ah Laisiangtho tawh kituak lo thute kumpi sang ah kisin sak hiam? A beisa 1860 ma ciangciang, kumpi sangte ah Pasion in mihing leh nate a bawl na thu kisin sak hi. Kikhel tohtohna thu ong minthan ciangin kumpi sangte ah kisin sak hi. Leitung galpi masa khit lam ciangin Pasion' thu-um William Jennings



Editor

Bryan in kumpi sangte ah sin sak nawn loh nading makai in ong vaihawm a, lawhcing lua lo dan in ka mu hi. Tennessee ah bel kikhel kik sak hi [<http://en.wikipedia.org>]. 1981 kumin Arkansas state ah mihingte /nate Pasion in a piansakna kumpi sang ah kihilhna ding thukham bawl ding a hanciam uh a, a tawpna ah zo uh hi. Luciana ah zong tua bang dan mah hi in a tawpna ah lel uh hi [http://www.religioustolerance.org/ev_hist.htm]. States tuamtuam ah, kihanciam zel in kilel den mawk ta hi. Hih kikhel tohtohna thu pen kumpi sangte ah nakpi zungkha ahah manin damdam in Pasion' thu-um mi kiam semsem hi. 1985 kum in Watchtower Bible and Tract Society pan akibawl khia, "Life-How did it get here? By evolution or by creation?" cih laibu page 21 na ah, mipilte in kikhel tohtohna thu bek nakpi in la uh a, a man lohnate imcip in sang ah kisin sak ahah manin mi tampi tak in, thu man thu tak in um ta uh a hihna gen hi. Tua laibu a kibawl a kipan tu dong Pasion' thu-um ki-kiam semsem lai ding hi. Hih bang upna pen Pasion kici om lo hi, a ci-te aa ahi hi. A lamdang khat ah, USA ah Pasion um lo (Atheist) mi 9 % bek om hi na pi lai sinna sangte ah amau' upna tawh ukcip zo mawk uh hi. Tua ban ah, pilna sang a sin seemseemte in Pasion' thu upna taisan in Pasion om lo hi cih lam ah pial pahpah uh hi, ci lai uh hi [<http://atheistempire.com>]. Hih mite' thu tawm en ni.

American Atheists, ki ci Pasion om lo kipawl na pen 1963 kum in US ah kiphuan khia hi. Amau gammial nasepna pen kumpi sangte ah Pasion' thu tawh kimakaihna tuamtuam thungetna cihte bei sak ding, Laisiangtho tawh kilehbulh upna ahi, kikhel tohtohna thu kumpi sangte ah sin sak

ding, kumpi leh biakna khen khia ding cih ahi hi [<http://www.atheists.org>]. 1960 a kipan kumpi sangte ah Pasion' pian sakna thu hilh kik ding hanciamna tuamtuam a om ciang a mau zong kipawl na tawh a kipan uh hi dingin ka um hi. A taktak in, Leitung ah hih bang upna pen 1859 khit, Darwin in a laibu a bawl khit lam a kipan kician takin ong khang to hi. Amau' aa dingin, Darwin' laibute pen a laisiangto (ei aa dingin lai nin) uh ahi mai hi. A dah huai mahmah khat ah, mipil pipi pawlkhat in sang thei uh hi. 2008 kum in Chicago pan a kibawl, The World Book Encyclopedia laibu page 426 ah, Darwin in a gen, kikhel tohtohna thu (evolution theory) pen mihing guh/ganhing guh lei sung pan a kimuh kikna tuamtuam tungtawn

in Leitung mipil a vekpi phial in thu takin sang ta uh hi, ci hi. Leitung ah Pasion cih bang om lo hi cih upna a nei, gam thupi zaw deuhte pen-Sweden 85 %, Japan 65 %, Denmark 80 %, Norway 72 %, South Korea 52 %, Germany 49 %, Britain 44 %, Australia 25 %, New Zealand 22 %, Singapore 13 % leh USA 9 % ahi hi. Gam tampi om lak ah et theih pak ding hih teng i la khia hi [Zuckerman, Phil. "Atheism: Contemporary

Rates and Patterns", chapter in The Cambridge Companion to Atheism, ed. by Michael Martin, Cambridge University Press: Cambridge, UK (2005)]. USA mite in Pasion' pian sakna leh Darwin gen kikhel tohtohna koi um zaw cih lungsim kaih khopna (poll) om thei den a, Pasion' pian sak hi a ci lamte in 54 % ciangciang tawh zo zel uh hi. A hi zongin Pasion' thu um a tam na zah in cih taak ka sa kei hi. 1859 khit, Darwin kici mipa' khat ii muhna hangin Leitung ah kha lam khuamialna ong kizeel hi.

A taktak in hih pa pen Pasion' thu um khat mah hi. Ganhing lam (zoology) leh leistung lam (Geology) pilna thuuk a nei khat hi a, 1831 December kha a kipan Beagle teembaw pi tawh Leitung mun tuamtuam veel koikoi ding in a pu mipilte tawh kithuah kha hi. Tuipi nawl ah, a tuah khak singkung, ganhing leh na tuamtuamte thuuk tak in ngaihsun in kantelna a bawl pahpah khat hi. Chile, Peru, South America, New Zealand, Brazil, South Africa leh Australia dong pai koikoi uh a 1836 October ni 2 in England tung kik uh hi [Charles Darwin: The Origin of Species and the Voyage of the Beagle, Everyman' Library, New York, page 17-517]. Pasion in ganhingte a ma' dan khat (law) tungtawn in bawl hi cih upna a nei gige ahahna pen hih a khualzinna pan a ciah dong a upna hi. Tua teng kawmkal ah, a it mahmah a tanu khat in 1851 kum in a sihsan ciang na sa lua in Pasion a upna bei hi. Nidang in a thu kantelna ah, Pasion in a bawl na, Creation cih pen la khia in, Leitung paizia (Nature) tawh kheh hi. 1859 kum in Ganhing cii tuamtuam a pian zia, The Origin of Species, bawl khia a, 1871 kum teh mihingte pian khatna (The Descent of Man, and Selection in Relation to Sex) laibu Laisiangtho tawh kilehbulh takin

ong bawl khia hi. Tua thu pen a deih vanglakte in naak deih mahmah uh a, Germany ah Nazi makai Hitler in ongnah kha hi. Mihingte pen ganhing mawkmawk khat bangin ong ngaihsun ta ahih manin mi that ding cih pen khensat hak sa het lo hi. Mi a tultul in that lel hi. A dam pha lote, kimanna a nei lo ding naupangte pen that mengmeng lel hi. Amau minam sung mahmah ah zong, minam lianpi suak ding deihna tawh ta tampi neih loh ding hanthawn hi. Mi tawm leh neek leh dawn a kipan vanzat kicing ding cih bangin a ngaihsutna pen Darwin in a thu bulphuh "Natural Selection" pan a ngah sawn ahi hi. Pasion' thu um Richard Weikart in a laibu bawlna sung ah Darwin tung pan ong piang khia upna hangin mi tampi in a sih lawhna thu tampi at hi. [From Darwin to Hitler: Evolutionary Ethics, Eugenics and Racism in Germany, 2004, page 233]

Leitung mipil khempeuh in hih thu um tuan lo uh hi. Leitung pilna tuamtuam ah kibulh thei ding tawh a kibat hangin a kitaangsam lai mihing guh leh ganhing guh pawlkhatte tawh kilak thei nai lo ahih man in thu tak in sang zo lo hi. Laisiangtho lam pan, Pasion in bawl hi cih pen a thu bek tawh kigen thei a, leitung pilna tuamtuam ah kibulh thei lo ahih man in Laisiangtho a um lote'n ong zat pih thei lo uh hi. Tua ban ah, ih Laisiangtho ah vantung a cih pen koi lai ah om hiam ci in zawn sawm le hang, pawlkhat in a kimu thei lo kha gam (sih nawn lohna) hi ci ding a, pawlkhat in a kipatcil in aksi leh ni/khapite vantung ah koih (Gen 1:18) ahih ciang a taktak in a om mah hi ci ding hi. Cihnopna ah, Laisiangtho a umte mahmah in zong, ih theih dan kibang lo lai ahihna gentehna khat kong gen pak ahi hi. Ahi zongin, Pasion in leitung vantung leh mihing nate bawl hi cih Laisiangtho umte' genna tawh a kilamdang lo, leitung pilna tungtawn in a kimu khia ngaihsutna nam khat Seattle ah piang khia a, gam dang mipil (scientists) pawlkhat tawh kizom uh hi. A makai pipa pen University of California ah Law lam ah sangsia a seem Phillip E. Johnson hi a, 1990 kum pan a kipan khia ahi hi [Thomas Woodward: Doubts About Darwin, Baker Books, 2004, page 19]. Tua pen intelligent design (ID) kici a, na khempeuh a hih khat om ding hi, a om sa khat peuh nih leh thum suak toto in a kikhel toto hi lo ding hi cih upna hi. Gentehna in meikang khawng, mi kihat khawng a om ciang, a seem khat zon loh pha mawh hi. A geel/ a bawl khat a om ciang bek in a piang hi bek hi. Tua pen Pasion zong hi thei, Pasion lo zong hi thei cih upna hi. A tawpna ah Pasion' thu-umte in Pasion mah ngawh loh phamawh ahi hi. Mihingte ci leh sa sung ah molecule-te leh pumpi sung ah na aseem diamdiamte ih et ciangin geel na lo pi in mawk pian zuahzuah theih ding hi lo a, lamdang mahmah hi. Darwin hun lai in, ci leh sa sung tawng-a mit tawh muh zawh loh sa them (molecule) te kimu thei nai lo ahihman hi ding hi, ci in ID upna a neite in gen sia uh hi. Tu hun Darwin a umte leuleu in, a tawpna ah nate a bawl/geel pen koi hiam cih kilak thei kei leh thu tak in kisang thei tuan lo hi, ci uh hi. Leitung dang a hi, Mars ah nuntaakna a om leh tua

tung pan zong ei omna leitung ah nuntaakna a pian zia kithei ding, Pasion om lo ahihna kician ding ci in Mars ah bang om cih theih ding hanciam uh hi. 1960 khit lam in Mars leitang pan huhi lak ah kileh koikoi ding a a bawl uh thu kantelna mutpuak vanleng (Balloon Mission) in a sanna 30,000 ft-130,000 ft kikal ah mit tawh muh zawh loh nuntaakna nei ganhing neute (microbial life) om cih mu uh hi. Tua nangawn pen leitung pan a ken khak uh hiam cih a um lote'n muangmawh leuleu hi [Hugh Ross: The Creator and the Cosmos, NavPress, 1993, page 145]. Pasion om lo hi, cih pen tu laitak mipilte' muh khiat nop thu khat leh a hanciamciam uh ahi hi.

Tu hun ciangin USA-a pilna sang zaw sinna University sangte ah Darwin upna kibulphuh in na kiseem hi. Sangsia Pasion' bawl sakna thu a gen khate a nasep kitawp sak in nasep dang zong ngah kik sak nawn lo hi. Mipil te in Darwin upna dung zui in tel beh na ding kantelna (research) bawl uh a pawlkhatte in a kilehbulh ID upna mukhia zaw hi. Tua bang mite sang pan kitawp sak pah hi. Darwin upna a dong kikkikte sangsia pan kihem khia ziauziau hi. Sangsia pawlkhatte a up loh uh hang, a nasep khahsuah nuam lo uh ahih manun bang mah pau ngam lo uh hi. Kumpi in hih upna pen a thu tak in la ahih manin, a dangte pen thu don nawn lo hi. Damdam in a dang upnate bei lel ding hi cih tawh kithusim nawn lo hi. Gam khempeuh ah pilna sangte hih bang dan hi tuan lo hi. A suakta mahmah a minthang USA in pilna lam ah suahtaakna (Academic Freedom) nei lo hi. Poland ahih leh, Pasion in leitung a pian sakna kihilh sak in, kikhel tohtohna (evolution) pen thu man thu tak in sang lo uh hi. Hih Pasion' thu tawh kituak lo, kikhel tohtohna thu a man lohnate gen theihna US kumpi ong piakna ding tu laitak Pasion thu umte in a hanciam laitak ahi hi. Hih thu a lunglut kha-te in, hih <http://www.expelledthemovie.com> website ah hawh ding zong kong hanthawn hi. A makai pa Ben Stein in documentary movie khat bawl a, lungsim ong su kha sak mahmah hi. EXPELLED: No Intelligence Allowed, cih thu lu tawh hi a, 2008 February kha sungin a kibawl khia ahi hi.

Galpi nihna hun lai in, dawimangpa in hih upna pen Hitler tung ah na guang a, leitung bup khem dingin na kipan hi. A zenzen in, Hitler in gal zo bang na hi leh, hih Darwin upna tawh leitung zaancip dingin ka um mawh hi. Pasion in leitung keem lai ahih manin, tua hanciamna taangtung lo hi. Tu hunciang in, dawimangpa in lampi dang khat tawh na ong seem leuleu hi. US leh gam lian zawdeuhte' sung ah hih upna khaici ong vawh hi. A diakdiak in, US pen nget in a neekneek inn khuamte tawh kibang ka sa hi. A thupit lam ong thei sak khol lo in, ong awl mawh lo sak hi.

Tua ahih manin, pilna sin Zomi khangthakte in inn pan leh biakinn pan mahin ih upnate a ngahna ding uh khatciat in hanciam ding kisam hi. Amau ong muhna ah zong et teh huai khat a hi zo dingin Topa'n thupha ong pia ciat ta hen!